

Broj: S1 3 Iž 027373 17 Iž
Sarajevo: 27.12.2017. godine

Sud Bosne i Hercegovine u Sarajevu, u apelacionom upravnom vijeću sastavljenom od sudija, Vesne Trifunović, predsjednika vijeća, dr Branka Moraita i Zvezdane Antonović, članova vijeća, odlučujući o žalbi Stranke demokratske akcije (kod 090), Sarajevo, Mehmeda Spahe 14, izjavljenoj protiv odluke Centralne izborne komisije Bosne i Hercegovine, broj: 03-07-6-325/17 od 06.12.2017. godine, u pravnoj stvari izricanja novčane kazne zbog kršenja Zakona o finansiranju političkih stranaka, u nejavnoj sjednici održanoj dana 27.12.2017. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, žaliteljici, Stranci demokratske akcije, izrečena je novčana kazna u iznosu od ukupno 33.000,00 KM zbog odgovornosti što u 2015. godini nije evidentirala u poslovnim knjigama nenovčane donacije, čime je prekršila odredbu člana 5. stav (4) Zakon o finansiranju političkih stranaka („Službeni glasnik BiH“, br. 95/12 i 41/16 (u nastavku teksta: Zakon o finansiranju).

Žaliteljica je blagovremeno uložio žalbu na navedenu odluku. U žalbi navodi da žalbu da žalbu ulaže zbog pogrešno i nepotpuno utvrđenog činjeničnog stanja, pogrešne primjene materijalnog prava i povrede političkih prava zagarantovanih Općim okvirnim sporazumom za mir u BiH i Ustavom BiH. U žalbu ne spori da je žaliteljica koristila poslovne prostore u devet općina u skladu s odredbom člana 8. Stav (2) Zakona o finansiranju na osnovu odluka nadležnih organa u općinama za šta su uredno dostavili dokumentaciju CIK BiH, a što prvostepeni organ ne spori. Nadalje, u žalbi ističe da ne vidi u čemu su kršili odredbu člana 5. Stav 4. Zakona o finansiranju. Potom ističe da je dostavila odluke nadležnih organa općina donatora iz čega se vidi da je zapravo na taj način evidentirala nenovčanme donacije. Najzad, tvrdi da nije bila u stanju da utvrdi protivrednost nenovčanih donacija i da ih u novčanom iznosu evidentira u skladu s odredbom člana 5. Stav 3. Zakona o finansiranju. Predlaže da Apelacioni odjel Suda BiH usvoji žalbu.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Kako proizilazi iz stanja u spisu predmeta, donosilac ožalbene odluke, Centralna izborna komisija Bosne i Hercegovine, je na pravilan i zakonit način utvrdila u ožalbenoj odluci da je Služba za reviziju finansiranja političkih stranaka Centralne izborne komisije BiH, na osnovu odredbe člana 14. Stav 3. Zakona o

finansiranju, izvršila je pregled godišnjeg finansijskog izvještaja političke stranke, Stranke demokratske akcije za 2015. godinu i konačnim izvještajem, broj: 03-07-6-3335/17 od 22.07.2017. godine utvrdila da je ova politička stranka u 2015. godini kršila odredbe Zakona o finansiranju, na način da nije u poslovnim knjigama evidentirala nenovčane donacije po osnovu besplatnog korišćenja poslovnih prostora u devet općina (Bosanska Krupa, Gradačac, Hadžići, Fojnica, Jablanica, Foča-Ustokolina, Ilijaš, Novo Sarajevo i Stari Grad). Prema stanju u spisu predmeta ovo vijeće Suda Bosne i Hercegovine zaključuje da nisu osnovani žalbeni navodi kako nije potpuno i pravilno, od strane donosioca ožalbene odluke, utvrđeno činjenično stanje i proveden dokazni postupak, jer je, prema stanju u spisu predmeta, bjelodano da je CIK BiH pozvala ovlašteno lice žaliteljice na davanje izjave povodom revizijskih izvještaja, a u izjavi je stajalo da općine, čiju imovinu u vidu poslovnih prostora je žaliteljica besplatno koristila, nisu žalitelji dostavile cijene poslovnih prostora koje koriste općinske organizacije žaliteljice tako da žaliteljica nije bila sama u mogućnosti evidentirati i odrediti cijene istih. Na taj način je, nesporno, utvrđeno da žaliteljica nije u poslovnim knjigama evidentirala nenovčane donacije po osnovu besplatnog korišćenja poslovnih prostora u devet općina (Bosanska Krupa, Gradačac, Hadžići, Fojnica, Jablanica, Foča-Ustokolina, Ilijaš, Novo Sarajevo i Stari Grad), čime je izvršena povreda odredbe člana 5. stav 4. Zakona o finansiranju kojom je propisano da su političke stranke dužne voditi evidencije o prijemu članarina i dobrovoljnih priloga, te izdavati potvrde o prijemu članarina i dobrovoljnih priloga.

Uvidom u spis predmeta utvrđeno je da je novčana kazna adekvatno odmjerene, s obzirom da je žaliteljica već osam puta kažnjavana, da je ekonomsko stanje žaliteljice iz godišnjeg finansijskog izvještaja za 2015. godinu., ukupan prihod u iznosu od 4.049.363,36 KM, te da je izrekla novčanu kaznu pravilnom primjenom odredbe člana 15. stav 2. u vezi s članom 19. Zakona o finansiranju.

Iz svega iznesenog može se sa sigurnošću utvrditi da je ožalbena odluka zasnovana na materijalnim propisima i da je u zakonito provedenom postupku dokazana odgovornost političke stranke žaliteljice i izrečena kazna koja odgovara težini učinjene povrede, uz napomenu da je mogla biti izrečena i bitno strožija novčana kazna zapriječena za učinjenu povredu.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, broj 19/02 do 74/10) valjalo odbiti.

**PREDSJEDNIK VIJEĆA
S U D I J A**

